

غاب القمر

الشاعرة ومضة



غاب القمر / تأليف الشاعرة ومضة
إخراج / وائل عبدالمجيد

الطبعة الأولى 1434 هـ - 2013 م

تدمك ISBN 978-9948-16-812-6

SIZE: 13.5 X 19 كتاب من القطع الوسط عدد الصفحات «204 صفحة»

رقم المطبوع 1/100122/31272



دار هماليل للطباعة والنشر
Hamaleel Printing & Publishing House



ت: 00971-2-4460777 - ف: 00971-2-4469911

صندوق البريد: 130777

البريد الإلكتروني: hamaleel@hamaleel.ae

الموقع الإلكتروني: www.hamaleel.ae



مؤسسة هماليل للإعلام

مؤسسة اعلامية تُعنى بالأدب والفكر والثقافة والموروث .

© جميع الحقوق محفوظة لمؤسسة هماليل للإعلام

إن دار هماليل للطباعة والنشر تحترم آراء المؤلف وأفكاره وتشجعه على الإبداع والنشر، وكل الآراء الواردة في هذا الكتاب تخص المؤلف ولا تعبر بالضرورة عن المؤسسة .

obeikandi.com

غاب القمر

obeikandi.com

الإهداء

إذا ربي كتب لي في قلوب الناس بعض الحب

فذا يعني بأن الوقت يفتح للبحث « ومضه »

تصريح

لا تشتري قلبي وترميهِ للريح
ما هو بطيرٍ في البراري تهده
هاك ادخله يا صاحبي دون تصريح
واخذ الذي في خاطرك او توده
اتعبتني يا مروي الفطر الفيح
لا واعنى اللي يقصدك ثم تصده
حرام تتركني وانا اقوم واطيح
وحرام بابك في عيوني تسده

شف خافقي لي من تركته غدى يصيح
كنه غزال وبه ذياب تحدّه
رجوای لا تقسى ولا تزيد تجريح
وان جاك قلبي طامع لا ترده

شاعري المجهول

مثلك ترى بَقول حلمي طواه الوقت
وجسمي بَلِّيا روح والموت كان ارحم

يا شاعري المجهول لاتزيد بُعد وصمت
ارفق علي يا زين وما قلت لك قل تم

لوشفتني مشتاق هايم بكم ما نمت
قول الغلا معذور مجنون بي مغرم

سويت نفسك طير قُلي لماذا غبت
والطير مهما غاب العش يبقى هم

ادري بقلبك غير ولو بوصله ما رمت
ولو قالوا العذال اقول انا ما اهتم
قالوا الشعر وش فيه كله غزل واحترت
اكتب عن اسرائيل عن حرب والا دم
وش فايده هالقول وش فايده ما قلت
لي صار اهل الحق صوتِ بلياً فم
يا شاعري المجهول عود علي لاهنت
ما لي انا بالناس ولغيركم ما اهتم
كل خذاه الموت واخاف انا وان مت
اترك بقايا ذنوب «وعليك» انت تعم

الليالي

طعت الليالي والليالي تعانداك

تشفيك من جرحٍ وترميكَ برماح

حتى الزمن يا صاحبي ما يسانداك

والأبشر يا كثرهم مثل الاشباح

جرب على مر الدهر من يساعداك

والأيمد ايده لجل يوم ترتاح

دنيا غريبه وكل يومٍ تواعدك

توعدك بالجنه وتسقي لك اجراح

ولو تحلف برب الفلك او تعاهدك
أو تذرف دموعٍ من العين يا صاح
تكذب عليك وهمها لو تشاهدك
غرقان في همك وتنسك الافراح
ولو كل حزنٍ في حياتك يعاودك
بثكون طيرٍ بس ما تملك اجنّاح
ليت السعد حلم وبالليل راودك
والأ^و مثل نجم وبالكون وضّاح

ودي بزمانك لو يجي أو يعايدك
لكن غدره باقي فيه ما انزاح
يقول طعني دام انا اليوم رايدك
بشفيك من جرح وبرميك برماح !

دنیا المصالح..

مرتاح بالي وذكر الله ملازمي
والحمد للي عطاني نعمة البسمه

قلبي كبير وظلم الناس ذابحني
كل تنكر وكل رامي سهمه

عشت بزمان كثير الدمع صاحبي
ابكي لحالي وليلي ضايع نجمه

ما به رفيق سوى هم يواعدني
وحزن تنكر وجاني امغير باسمه

واقرب قريب طلبته « لا » يقاطعني

لكن عقله شحيح ضائع فهمه

وانا بطيبي اشوف الناس تاخذني

من دون شكرا.. وشي يزرع الرحمه

ان قلت عندي لفي منهو مخاصمني

دنيا المصالح وكل يطلبك خدمه

وان جيت بشكي واقول الوقت ظالمني

صاروا سراب وكل غيره رقمه

اسأل عليهم وليل البعد حاصرني

كل يسدد علي ويتقن الهجوم

واللي نساني رجع عندي يجاملني

مايدري اني نسيتاه وانتهى رسمه

هذي حياتي وكيفك لو تفارقني

طبعك غريب وبعدك عشت في نعمه

ازعل على كيفك !

لا انتہ بهاويني ولا ني بشاريك
ولاني على ما اقول خلي جزوعه

شَمَّتْ فيني الخلق ربي يجازيك
على صغيرٍ تو ما اطفى شموعه

ازعل على كيفك ولاني مراضيك
ماني من اللي طيبته في رجوعه

يا ما تحملتك وقلبي يداريك
ويقول لك عمري ويعلن خضوعه

تَزُعل وتبعد وين ودي أَلأقيك

ما دام قلبك راح عني بطوعه

عِشَّتني بالهم ربي يجازيك

وحطيت في قلبي ثمانين لوعه

مسموح

بالقرب دايماً خلك وُياي لا تبتعد عني ولا تروح

يظلم علي الكون دنياي طيف الحزن فيها ترى يلوح

من صغر سنك كنت نسائي تنسى وقلبي منك مجروح

ترحل وهمك دوم فرقاي سهل عليك تروح بالروح

ما هو مثل حالي وشرواي من سبتك لي قلب مذبوح

الحب فيني حي وياي للناس لا ما كان مفضوح

ولو كان همك كله رضاي عود وانا بقول مسموح

تبقى معي دايماً وذكراي تبقى معاك لآخر الروح

يا أغلى حبيب كل مسعائي ألقى الوفا لي عطر ويفوح

تعب

تعب هذا العمر كله تعب هذي الدروب طوال

تعب هذا البحر يعطي وياخذ والثلث غالي

تعب قلبي من الدنيا تعب ينشد عن الاحوال

تعب من حاجته للي سقاه المر والحالي

تعب دمعي من الماضي تعب جرح طرى في البال

تعب حلم تمنيته وضاع بسببة اهمالي !

تعب هذا الظلام اللي يلف بحيلته الاطلال

تعب هذا الفرح كنه مثل ذاك النجم عالي

تعب هذا القلم يكتب ويكتب والحكي ينقال

تعب هذا الورق حبرٍ يسيل ويذبح امالي

تعب عقلي من الذكرى تعب فكري من الترحال

تعب صوتي من غيابه صداه يمر في بالي

تعب هذا الشقا كله تعب هذي الظنون ظلال

تعب هذا الوله يذبح خفوقٍ مارحم حالي

تعب هذا السفر طوّل تعب غصن الشجر ينشال

تعب هذا الطفل يبكي واشوفه حظي وفالي

تعبت ومن كثر صمتي لقيت ان التعب قتال

لقيت ان العمر فرحه وقلبي للاسف سالي

لقيت ان التعب حزنٍ عزف من صرختي موال

عزف بانغامه وردد وانا رديت موالي

فلسفه

اتركي عنك الميانه والدلع خليه لاهله
والجمال اللي بوجهك يا خساره بدون معنى

تحسبين الوقت خل ودنيتك بتجيك سهله
ملعبك قلتي كبير وما اكبره لو فيه طفنا

وقلتي ان الكون ورده فلسفه والقول عله
ما دريتي وان دريتي قبلكم هالموت شفنا

ان مشينا ما وقفنا وللحزن مليون رحله
والجبان يصير عنتر والشجاع يقول ضعنا

هالزمن يا بنت عمي مويته بتصير وحله

والطيور تموت حوله بين هم وبين حزنا

الرفيق ان زاد ماله للاسف بيزيد جهله

ذا زمان فيه خلك لو شريته قال بعنا

ياخذ انفاusk وتصبح زهرة ويصير نحله

ياخذ اجمل ما ملكته والعمر كم ضاع منا

لايغرك وان ضحك لك له ترى مليون عمله

جربه واسمع وفكر ذا زمانٍ منه خفنا

بالكذب والغش يمشي ويكشفه ربي بفعله

علمه والا بمعنى يا فطين افطن فطنا

وتدري ان الكون عندي تمرتين فوق نخله

مرها يسبق حلاها والزمن وان مال طعنا

العذر وان زاد هرجي مابقى بالعين كحله

ولابقى لي غير جرح ينكشف لي قلت تبنا

غصون المواجه

على طريق المآسي رحلت بي شرقا
خالفت قلبي معاك وقلت لك عادي

اثر المحبه معك يا صاحبي فرقا
والوصل حرب وعذاب ودايم اجهادي !

طوّلت بالي وصبري دايم يرقا
وانا ادري انك بخيل بحبك وسادي !

نهيت قلبي وناحت ساجع الورقا
على غصون المواجه دمعا شادي

انا اشهد انك قوي الباس لك طرقا
وانا رهيفة مشاعر واتبع فؤادي
اثر المحبه بحور ولجة زرقا
يُغتر فيها المحب بشكلها الهادي
لو عاد يمديني ارجع رحت لك شرقا
من وين دربك يودي قلت لك عادي
بخيل ديمة سحابك واتبع البرقا
وامني النفس شوفك لو هو حدادي !

نور الدار

لا تَعُوذْنِي عَلَى بُعْدِكَ.. أَبَد
خوفتي ياخذك ذنبٍ من جفائك
أهتوي قلبك ولا ودِّي بأحد
فيك يا لغالي يشاركني بغلاك
رؤف بي ياالزين يا وجه السعد
دامك الدنيا وموتي والهلاك
ودمت نور الدار عندي والبلد
والعمر والشوف ما يسوى بلاك

والسؤال اليوم وش له تبتعد ؟!

قاطع و ضلك و علمي ما لفاك

وش هي اظروفاك أو انك بالعمد

تبعده صوتك وحن نطلب رضاك ؟!

بسألك وشلون تقوى « ع » البعد

يوم أنا فكري غدا كله معاك ؟؟

وكيف تتركني بليلك والرعذ

حاصر أشواقي.. وأنا اتمنى دفاك؟

وأحلم إن القلب في دارك رقد
وأنت تتجاهل وأنا ما لي سواك
خلْ عَنْكَ البُعد دام إنَّ القصد
بسْ تغذيبي وأنا بُمشي وراك !
الوله والشوق كلّه لك سجد
واطلب غيوني وتصبح لك فِداك

واحشني

بعادك صاحبي طول وانا ماشوف له تبرير

وصوتك حيل واحشني وليته سمعي يضمه

اذا غلطان علمني ترى لك قدر عندي غير

وانا ما اقوى الصبر عنك لأنني فيك مهمته

طلبتك بس خبرني وما تطلب ترى بيصير

يجيك اللي تبي مني وشوقي لك ابا الممه

هديتك عيني وروحي وقلب ما يبي تغيير

وشوق ما اوجد مثله مشاعر حيل ملتمه

بعادك صدق بي اثر و خلاني بلا تفكير

يقول القلب ذا قاسي وعيني تقول وش همه

انا ودي عن غيابك يا غالي تعطي التفسير

ذبحت الشوق يا شوقي بعد ما كان بالقمه

دخيلك يا بعد حيي ترفق يا عساك بخير

كأن البعد لي طفل صغير لصدري اضمه

انا بدنياك يا غالي مثل عش سكنه الطير

ومثل ورد بروحاتك وجياتك يبي تشمه

يجيك القلب متوله بلا زيفٍ ولا تزوير

طمع في ضحكة اشفاهك وشوقه جاري بدمه

انا بحفظك في عيني وصعب اجيبه التعبير

عساك بعيشتك تهنى وشخصك ما حد يذمه

نفترق احسن !

حبكم في وسط قلبي صار شوكة
والفراق احسن وهذي كلمتي

انت لو حبيت ما زادت شكوكه
قلبك اللي كان عيني وفرحتي

وكذبتك يا صاح ماهي بِمَحَبُّوكه
اكتشفتك بس راضي بقسمتي

ليت قلبك بس ما غيّر سلوكه
ولا جرح قلبي وسيل دمعتي

وليت قلبي ليت ما سلم صكوكة
لك ولا في يوم كنت بدنيتي
بالغدر والكذب قصتك امحيوكه
وبالصدق جيتك وهذي غلطتي !
لا تحسب اني بعود لك ضحوكه
بعد ما ماتت بايدك وردتي
الفراق « الحل » دامك صرت شوكة
واخذ للذكرى شقاي وبصمتي

علم الغيب

بادي وبذكر أنا الله لي جميع الناس يرجونه

خالق الدنيا وخلق الله بالخفا والجهر يدعونه

طلبتي يا ناس يعل الله يبعد الحساد ويصونه

صاحب لي قد عطاءه الله كل حسن الارض يحوونه

ماحد بالكون لا والله مثل خلي تذبح عيونه

غايب والعلم عند الله هل ذكر في البعد مضمونه؟!

هل حفظ ودي وعهد الله؟ أو نسي واصبحت مدفونه

ويل قلبٍ ما يخاف الله يجرح المحبوب ويخونه

يهجره ويقول حكم الله وما لنا سلطه على كونه

وكان خان العهد خان الله والا انا ماتهمني طعونه

صابرٍ والأمر بأيد الله لي كشف ما الناس يخفونه

وعقب غيبه كان راد الله يلتقي الداين ومديونه

دام علم الغيب عند الله ينتظرها "تمطر" مزونك

مطلقه

يا عرب وش حيلة اللي حظها
ضايع والاسم صار مطلقه
كل من في الكون كل ذمها
حظها ياناس ماهي موفقه
ارحموا بنت تضاعف دمعها
وكل ماتسمع بطيب تصدقه
مالقت بالناس منهو جنبها
كيف ضاع الطير وامه محلقه

ليت ما شي وقف في دربها
وليت اهلها ماخذو منها الثقة
ان عطتهم راي من يسمع لها
كلمة المسكين قالوا تغرقه
تضحك وتبكي ومن يدري بها
كنها ورد وبحبل معلقه
ما تبني تشكي وتفضح امرها
لانها بعيون ناس ضيقه
لا صديق ولا قريب جنبها
وذنبها يا ناس انها مطلقه

دخيلك

انا ذيك الحروف اللي كتبها عاشقٍ مجهول

انا ذاك الغرام اللي تعدى ظلمة سجونك

انا يا فرحتي حلمٍ ذبحته والعيون اذهول

سرابٍ يذبح الضامي متى ما زدت بطعونك

انا وان كنت ما تدري "على يمكن" يجي ويقول

على درب تخيرته مشيت وضعت بعيونك

متى ما قلت لك قرّب اشوفك جيتني مذهول

وحظي للأسف اني اعيش وانتهى بكونك

عشقتك والسبب اني وحيدہ والقدر مسؤول

عشقت وما دريت انك تبي تختال بطعونك

غدرت وجيتني طامع اسامح بس مو معقول

تكون انت الذي ياخذ وانا اسدد لك ديونك

دخيلك بس لو مره تحاسب عقلك « المشلول »

متى كان الهوى حبل و عليه تعلق ذنوبك

جيت من طيبي

لا تعذّر بس يكفيني غيابك
وابتعد ما دام هذا اللي مقدر

كم صبرت وكم تُحملته عذابك
وكل يوم اقول بكره بيتغير

لي متى يا صاحبي بقوى عتابك
تحسب إن القلب عمره ما تكدر

والله إن الروح تبكي من مصابك
والعيون تقول يا قلبي تصبر

تبتعد مره وترجع لي بسحابك
وكل يوم أقول نهرك بيتحدر

الغريبه كيف يعجبني سرابك؟
والغريبه قلبي اللي لك مسير

تحسب ان القلب عمره ما تكدر؟!
واني الميت وياليتك تقدر

بس من طيبي بغيت اسمع جوابك
ولاني المخطي ولاجيت أتعذر

روح مع غيري وسكّنه بهدا بك
والبعد حَلِّ أنا فيه المخير

« تحسب اني يوم انا دقيت بابك »
اني الميت وياليتك تقدر

البحر مثلي ..

يخاف الليل وبوجه النجوم أمسكٍ بابه
ويبقى هالفضا خالي حزين ودمعته تقطر

ضباب يلفنا صمته وكونك كيف نُحيابه
بدونك يا قمر نسكت وصعب اعيوننا تسهر

نضيع بعالم الذكرى خيالٍ يسكن أهدابه
زمن فيه الألم عادي مجرد حزن مو أكثر !

وأنا دون القمر ضايع علي كم طوّل اغيابه
وأخافه هالجفا وان طال ما نقوى ولا نصبر

وأخاف إن البحر مثلي ودمعه يغلب اعتابه
يسابق موجته والّا إذا طال الوعد يكفر !!

دخيل الله يا قلبي ترّفق واسمع أسبابه
قمرنا مانبي يزعل علينا وأنت ما تقدر

فخله وقت ما يظهر سكون الليل وأحبابه
ونجمه وإن ظهر قلّه غيابك صدق بي أثر

قمرنا بالسما عالي رفيع وما حدِّ عابه
نحبه لو رحل عنا، وغاب وفينا ما يشعر !

قمرنا ما حدٍ مثله ولا ظني حدٌ اغتابه
يحلِّي ذا العمر كلّهُ بنوره وقت ما ينور

فلا يومٍ نبي الفرقا سنين العمر كذابه
وموج البحر في طبعه خجول ودائم يغدر

وتدري يا قمروضلك يزيح الهم واتعابه
فخلّك بالسما عالي وشوق الناس لك يكبر

زمان التجني

جيت ابكتب قصيده لجل اغيض الحروف
وكل حرفٍ لفاني راغبٍ بالسلام
وكلما قلت ابكتب عاندتني الظروف
والزمن يا رفيقي ما له اي التزام
ان مشينا تعبنا والعرب ماتروف
حيث كل ن تعود يستبيح الكلام
يا رفيقي تأمل وجه كل الضيوف
بين حزن ومآسي بين نور وظلام

كلهم مثل وردٍ قطّعتَه السيوف
وان بغينا نعاتب سارعوا بالخصام
ودون ما اوصف وابلغ انتَه اللي تشوف
ذا زمان التجني والعتب واللام
ولو تموت المشاعر من عليها يطوف
من يحس بألمنا لي سكن بالعظام
قلت ابكتب قصيده لجل اغيض الحروف
بس حرفي عصاني واعلنه الانهزام

متى الليل يلفي؟

يكفي عذاب وما حصل منك يكفي
هذا قراري يا زمان المصايب

ماشفت دمعاً من العين تقفي
ملّت من الحبسه وجور القرايب

يا وقت طمّني متى الليل يلفي
وإنّ السوالف ما خذتها الهبايب

وعطني الوعد ما ترسم اليوم حتفي
وسيفك تحطه عند ذيك النصايب

يا ويل حالي يوم أنا قلت خلفي
ربعي وناسي وكلهم لي حبايب

كان العشم فيهم وكم طاح سقفي
فوقي وأقول إن لأمل لي سحايب !

دايم أسامح واطلب الله يطفني
نارٍ بقلبي ولا يزيد اللهايب

ملت يا وقتي متى الجو يصفني
ومتى الملاقا يا زمان العجايب

حملك ثقیل وما تحملہ كفی
وادمیتني من دون ذنب وسبايب
شفت العنا منك ولا فاد زحفي
جيشی نحرته وأصبح اليوم غايب
ما عاد به شيء عن الناس مخفي
ولاعدت ذاك الحلم بين الهدايب
هذا قراري وانته اليوم معفي
يا من خذاني بالغصب والنهایب !

غدر الحریم

یاللی تقول ان الغدر طبع تشوفه بالحریم
وان الهوى وان الوفا ما یملکه غیر الرجال

تاخذ علینا بالثلاث وتقول ذا امر الکریم
هذي حرام مطلقه وهذي لها خمسة عیال

وهذي تعيش بهالفقر وهذي لها طفل یتیم
وهذي حرام شکبرها واخاف یدبل هالجمال

دایم تطلّع لك عذر وتقول انا قلبي رحیم
وما اقصد انا غیر الاجر واشیل حمل کالجبال

كذاب انا ادري بك نعم يسكنك شيطانٍ رجيم
وما تقتنع باللي معك والزير هو اكبر مثال
تضرب وتهجر وش بعد شبهتنا ف بيتٍ قديم
وخليتنا مثل البحر دايم وموجه في جدال
بسألك انا يا صاحبي ياللي تقول انك حكيم
وبحق منهو بالسما عرشه وعلمنا الحلال
وارجوك لا تخفي الخطا أو تصبح بطبعك لئيم
ولا تقول انا اللي صح وانتم في ظلال

منهو الذي لو « غبت » يرعى الدار كنكّ به مقيم
ومنهو الذي لو طحت في جهلك يمدّلك الحبال
ومنهو الذي لو جيته بكذبك يقول انت الفهيم
اضرب على كيفك وهاك الخيزرانه والعقال
لاتحسب ان هالوصف يعجبنا او انه مو أليم
ولاتحسب الطيبه ضعف منّا وعالمنا خيال
مايذبح المرأه سوى المرأه وذى طبع الحريم
والا الكلام اللي تقوله كذب ممزوج بخبال

صاحبي

العرب يا صاحبي تخطي وذا الطبع فينا ترى مبطي
حد ياخذ حد ما يعطي وكيف ماودك تسميها !

انشدك بالله يا خلي لي خطيت استغفر وصلي
وخل كل همومك تُولي تملك الدنيا وما فيها

رحمة من رب هالكوني ماحد بيدوم محزوني
وجرحكم لابد بيهوني ريح عيونك وهدّيها

صاحبي هالجرح من بدري والعرب بالحال ماتدري
صابرٍ والآه في صدري اكنم جروحي واخفيها

لو شكيت احذر من الغادر لي كلامه يكسر الخاطر
بالحزن لي فيك مب شاعر يكشف علومك ويبيديها

وبالنهايه بطلب الخالق يسعدك لي صرت متضايق
راغب بالخير لك عاشق دمعك حاول تعديها

ما هو غلط

يا هل ترى صوتي يسبب لك ازعاج
او هو كذا احساسى معك دوم مخطي

ما ودي احطك معي دوم باحراج
غالي ويرخص كل ما تريد واعطي

تدري بشوفك تضحك عيون وحجاج
ويخف همي وانتكاسي وضغطي

وتدري على هالراس انا احطكم تاج
ياللي رسومه في ضميري بتبطي

ما هو غلط لي قلت لك يوم محتاج
بس الغلط لي صرت يا صاح تخطي

كل اعتقادي بأن صوتي به ابهاج
وانه قلبك دون حارس وشرطي

بعض المشاعر ما تبني صرف وعلاج
مثل العيون اللي بلا قيد تعطي

وهذي عيوني لك تراتيل وسراج
ياللي رسمته بين عطري ومشطي

ابعد من الارض !

اشتكي لاهلي وهم ما يسمعون
مادروا عن حالي واللي حصل

العيون السود ما عادت عيون
زارني هم ولفاني في عجل !

لوبغيت احكي عجب ما يفهمون
وكل وردٍ في حدايقهم ذبل

اصطنع فرحي وانا كلي طعون
واكتم احزاني وانا كلي خجل

يا زمان الصمت قلبي من تكون

ولي متى ترخي وانا اشد الحبل ؟!

ان حكيت الصدق مني يزعلون !

وحبهم ياوقت ماجا بالسهل

احلم بدنيا بها حزني يهون

ما يموت الحب فيها والامل

او اعيش بكوكبٍ كله سكون

ابعد من الارض واقرب من زحل

وما يرافقني سوى قلبٍ حنون
ما يعرف الكذب واهله والزعل
لكن اللي صار ربعي يجهلون
من كثر دمعي غبى خط الكحل
لا الصبر ينفع ولا هم يفقهون
كلهم تخريف واهموم وعلل
بحتمل واصبر عسا هم يدركون
ان عمر الريح ما هزت جبل

أفا والله

ألا يا ناس بالله خبروني
عن اللي صار بالدنيا غريبي
خطبني ولد عمي واغصبوني
ومالي حيلة «الانه» قريبي
يحب اختي ويا ليت افهموني
بأن الحب مابه ما يعيبي !
خذيته غصب عني وادفنوني
وقالوا لي ترى هذا نصيبي

صبرت وقلت يا ناس اسمعوني
بعيش العمر واصبح له حبيبي
بلبي مطلبه لو هم بغوني
وعن عيني ابد لا ما يغيبني
ولكن صدمتي يوم اذبحوني
على الهاتف وشخصٍ مب غريبي !
مع اختي كان يسهر واطعنوني
سهام الغدر فيني من يثيبي !

حسافه يوم انا قلت اذكروني
ويبقى ذكركم مسكي وطيبني
اصون الود وانتم تتركوني
افا والله بكم ظني يخيني
رسايل حب ليه اتعذبوني
مع غيري ووقتي ما يطيبني ؟!
فيا ليت بقصيدي تنظروني
وتحسوا قبل ما قلبي يشيبي
اخاف انكم إلى الموت اتحدوني
ويمضي العمر ما القى من يجيبي !

تشيل الورد

انا ما قلت لك وينك ولكن صحت لك عود

صرخت بصوتي الخجلان قلت ارجوك تسمعني

لعبت بحسبت ايامي وحسبتك مثلي متعود

تشيل احزاني وهمي وعن دنياي ترفعني

انا ما بغاك لي طفل بثوبي دوم متيود

ابيك تلملم احلامي بشوق وعطف تجمعني

ابيك ان قلت روح اشوف احساسك معود

تشيل الورد في عينك وتسال هالبشر عني

اعیش بـماضـی و ذکرـی اَلیـمـه دایـم تـزوّد

حـنـینِ بالـحـشا یـزدا د و قـلبـک لیـه یـمـنـعـنی

مـشـاعـرنا تـری ما هـی قـلوبِ بالـجـفا تـسوّد

ولا هـی یا لـغـلا در ب طـویلِ فیـه تـدـفـعـنی

لك وحشه..

لي متى يا صاحبي بقوى غيابك
تُحسب إن القلب عمره ما تكدر

والله إن الروح تبكي من عذابك
والعيون تُقول يا قلبي تصبر

كانت العاده تجي واسمع جوابك
ودائِم تسأل وعن حالي تُخبر

لكن انت اليوم مدري وش مصابك
حالك إتبديل وفي طبعك تحير

هاتفك مُغلق وإذا بادقُ بابك
يا لطيف الروح قالوا لي مُسير
تدري لك وحشه وحِطه في حسابك
وصلكم يسوى عيوني ويمكن أكثر
عطني أسباب الجفا وإنهي عذابك
ويستريح العقل لي فيكم يفكر
دون ما زله.. يقاطعنا جنابك
واتصالك للأسف.. عنا تغير!

لو دريت إن الزهر ينظر سحابك
وان شوق العين عنكم كم تخبر
وانكم في البال دائم يا هلا بك
كثر ما غبتوا ويا ليتك تقدر
والعذر منك عسى تنهي غيابك
دام لك ناس، على صدك تعذر

حاول تفكر؟!

حالت الاقدار من دوني ودونك
والصياح يزيد لكن ما اسمعك!

ليه رحى ولىه تتركى بدونك
أه لى القلب عىا يتبعك

كنت انا كالتىر معجبته غصونك
راضى يقضى العمر كله معك

وكان لى حلم انا استوطن جفونك
وان طلبت العون قلبى ينفعك

وكنت انا اتمنى تعيشني بسجونك
ولا هقيت الناس عني تمنعك
يوم قلبي صادق وعيّا يخونك
ليه تنسى صاحبٍ كم دلّعك
صعبه الفرقى وما اصعبها طعونك
بس للفرقى وش اللي يدفعك
حاول تفكر وصارحها عيونك
من بيمسح في غيابي مدمعك

من مثل قلبي تحملها ظنونك
صابرٍ يمكن كلامي يقنعك
لا تجيب اعداء يكفيني جنونك
وابتعد ما دام هذا مطمعك
ما اجبرك تبقى اذا غيري يبونك
بس بالآخر قلبي مرجعك

وجودك والعدم !

ترى يا صاحبي واللّه وجودك والعدم واحد
ابد ما اثر غيابك على ومضه اذا تدري

شموخي وعزتي ترفض ارد واسمع الحاقد
ويرفض كل ما فيني اغبّي الجرح في صدري

انا لي طبع واسلوب و ردي بالفعل جامد
ابد ما بينّه ضعفي ودمعي يسبقه شعري

انا وان كنت يا جاهل صغيره فاللّه الشاهد
سكن في قلبي الطاهر كلام الخير من صغري

اجامل من يجاملني وشعوري صادق وراكد
ابد ما اتبعه شخص بطيشه يلعب ف بحري
ولا اجرح من يبي وصلي وجاني عاني وقاصد
ولا اخضع للذي وده يطفّي بالغدر جمري
انا ماني مثل غيري وغيري للاسف جاحد
احد يكذب واحد يجرح واحد يمشي على قبري
صبرت اكثر من اللازم وحظي ساهي وراقد
وصمتي طال واعيانني زماني بالعجل يجري
رفيقي والعذر منك وجودك والعدم واحد
واذا ما همّك غيابي بُعادك يسبقه شعري

انتهيت !

انتهيت و كل حلم لك حلمته ما حصل
واكتشفت اني بحبك كنت عايش بالوهم!

كيف تخذ عني بكلمه وكيف قلبك ما سأل؟!
و كيف تذبطني يا قاسي دون ربح ولا سهم

يعني ذنبي اني هويتك يوم لي صرت الأمل
ويوم توجّتك بقلبي فارسي ذاك الشهم

كنت مثل الورد الاحمر كيف في لحظه ذبل
و كيف كان الوقت يمضي وكيف قلبي ما فهم

كنت اناذي بالليالي وانتظر وقت الوصل
و كنت لي كل الاحبه و كنت بس انت الأهم

كنت اقول اني احبك وانت واقف كالجبل
واكتشفت انك خدعتة و قلبي عيشته بوهم

على الذكرى

«ع» شان الحب لي بيني وبينك يا ضيا هالكون

ابيك تعيش متهني مع ناسٍ يحبونك

وابيك تحب وتسامح مع ناسٍ صدق يسوون

لأن العمر ياغالي بدونك وشهو من دونك

ابا اهديك العيون اللي تحبك تعشقك بجنون

وبزرع من عيوني ورد ألين توصل عيونك

حبيبي وانت تدري بي ولا اظني تقول شلون

غلاك اللي ملا قلبي وصرت اليوم مجنونك

ابا احطك مثل قلبي مثل رمشي مثل لعيون
ابا ادرس بس فلسفتك وقانونك مع فنونك
ابي تجري مع دمي يانور العين يالمزيون
وبرضى بأي شي منك ولو هي زادت طعونك
انا لو تدري بقلبي بذك الزاويه مركون
يبيك تحس به والا تقول اليوم وشلونك
ابي اسهر دايم بليلك وليلي من الوله مشحون
ولا ادري وش اسوي به اذا ما عشت في كونك
حبيبي والعمر رايح وناس عشقهم ينسون
ابي دايم على ذكرى تعيش وتنهي ظنونك

غيبتك عني..

حبك بقلبي حبيبي صار له مده
ينشد عن عيونك اللي دوم تتركني
أرسلت لك بالمسا قلبي معه ورده
وعيون تبكي و تسأل ليش تهجرني
ما دمت تهوى عيوني ليش هالصدّه !
لازم تبين حنانك لي وترحمني
أهواك صدق و غلاكم واصل حده
ولودرت بالكون ما حد مول يشبهني

أشفق لشوفك وقلبك دايم يردّه

قلبٍ يحبك وقلبك ما نشد عني !

حبيبي عوّد وحبل الوصل لي مده

غيبتك عني إلى ها اليوم تتعبني

عزيزة نفس

أنا وإن شفت غالىنا تكبر
مسحت اسمه وخاصمته وعفته
رفيق الدرب عمره ما تغير
ولو يطلب نظر عيني وهبته
ولكن للأسف .. أمره يُحير
غريب الطبع ما كني عرفته !
بشغله والأهل دوم يتعذر
وانا اللي كل ما ينسى ذكرته

عزیزة نفس لكن ما یقدر
ولا یدري بشوقي كم حبسته
وأنا لي قلب عمره ما تُخبر
عن اللي باعني وبالرخص بعته
بدوسه وأعتبر هذا مقدر
ولو شفته بدربي ما نظرتہ
بعود قلبي اللي به يفكر
یشله مثل ما شلّه .. فقدته

وما دامه نسی ودي وتنکر
أنا بغلقه بابٍ له فتحته
وبُقطع حبل وُضلي وأتصبر
وانا الغلطان يوم إني عشقته !

obeikandi.com

أهل الحضاره !

يا عرب يا ناس يكفيننا تصّنع
ولي متى بنقول سهل وما نطوله
القلوب إضعاف والصدق ايتّرّفِع
والكذب في هالزمن كلّ يقوله
والوفا يا صاحبي طفلٍ تسّكع
والمصيبه للأسف محدّ ينوله
والزمان اليوم له ثوب مبقّع
لوّثوه أهل الحضاره بالسهوله

والدروب طوال للي ما توقّع
تُمد لك الاشواك بغيون خجوله
والحزن يا صاح بالقلب يتربّع
لي عرف ضَعْفك ترا سهل دخوله
والرفيق اليوم له وجه ملامع
ضايع بالفكر تسرح به خيوله
طوّل اللحيه وقالوا : له مطوّع
علموه إن الكذب أضل الرجوله

كَنَّهُ إِسْرَائِيلَ لَهُ فِكْرَةٌ تَوَسَّعَ
يُجْمَعُ أَتْبَاعُهُ وَيُكْشَفُ عَنْ مَيُولِهِ
صَدَّقُوا أَنَّ الدَّائِرَةَ أَضْلُ الْمَرْبَعِ
وَإِنْ قَتَلَ النَّاسُ مَعْنَاهَا الْبَطُولَةَ !
فَكَرَهُمْ أَصْبَحَ مِثْلَ حَبِّ مَنْقَعٍ
مَا ذَرَوْا أَنَّ الْمَوْتَ سَهْلٌ فِي حَصُولِهِ
وَمَا يَفِيدُ الْهَرَجَ مَعَ نَاسٍ تَشَّرَعُوا
بَابَهَا لِلْغَرْبِ وَ تُرِيدُ الْعُمُولَةَ

يا زمان الويل من فينا تطبع
ومن رضا بالذل جوله بعد جوله
من نسي أرضه وعرضه ثم ضيَّع
عقله الضميان بأفكارٍ عجوله
ويا عرب يا ناس من فينا توقع
نسأل الظالم و نرضاهها حلولة ؟!

وقف دخيلك ..

يا زمن من وين ما وليت وجهي ينكشف

الحزن والههم وجروحي غدت متضاربه

والرفيق اليوم وجهه لا ابد ما ينعرف

لابس ثوب الشجاعه وللأسف ما ناسبه

ان بغيت تقول دربك للغلط قام وحلف

والله ان الدرب دربي والخطا متقاربه

ماشي من خلف شيطانه واكيد بينجرف

من تبع قلبه وعاند له رفيق طالبه

وفي زمننا اليوم ربعك خلف مالك تنجرف

ما يهم ان كنت خاين او عيونك كاذبه !

يتبعك مثل الحمار يريد ترمي له علف

الطبع طبعه ولا همه من اللي راكبه

ان نصحته قال عادي والامر ما يختلف

وان بغيته للردى بيحك يفتل شاربه

احسب انه لصالحي يمشي ولكن للاسف

اكتشفت الغدر طبعه والامانه غايبه !

يا زمن وقف دخيلك صاب هالعالم تلف

واكثرية هالخلايق في بعضهم عايبه !

ظل وظلالي

مهجور قلبي ما حد بيوم مَره

ولا شاف حزنٍ بالضمائر شمالي

اشكي واقول الآه مليون مره

ولا حس فيني من غدى اليوم والي

صابر على ما ذقت حلوه ومُره

واقول هذا من سكن في خيالي

افديه انا بعمرى واشيل المضره

واحميه من كيد العرب والليالي

هاويه انا يا ناس لو زاد شَره
ولو كان قلبه قاسي ما يبالي
شوقى تعدّى ياعرب هالمجره
واللي احبه غنّا ما يسالي!
ولو شاف حالي حالتي ما تسرّه
سالي واشوف القرب منه محالي
لكن عسى بالطيب صوبي نجّره
وابوح له لو صار عنده مجالي
يمكن يطفى داخل الجوف حرّه
ويصير لي كالغيم ظل وظلالي

ما عدت احبه..

ما عدت احبه وارجو ان يسامحني !

حيث ان قلبي حزين بسبة احبابه

شلت الهموم وجروحه ما تفارقني

لا الصبح صبحي وليلي زاد بعتابه

ضيعت فرحي ولكن هل يجاوبني

او عل دمعي يوقّف بي على بابہ

مرت شهور وحيي له.. ينازعني

والقلب كم لي عزلته بسبة اقراه

اشتاق شوقٍ وشوقي له ملازمي

وان قلت بسمح يزيد الوقت بغيابه

اضحك واسامح وهو عن قصد جارحني

يا قوّ قلبه وانا احسبني من احبابه

ما عدت احبه.. وارجو ان يسامحني

لا الوقت وقته وهذا صار بأسبابه

كل الغلا

زفوني لغيره وانا اقول لله
ودموع عيني فوق خدي سكايب

ما افرح عيونه ولا اكون خله
ولا أضحك بوجهه ولو كان شايب

غدر خذوني والسحى كان عله
وبي من صروف الوقت هم ومصايب

وش حيلتي لي صار قلبي محله
وقلبه ينادي خافق فيه ذايب

خَلَّ هَوَيْتَهُ كُنْتُ وَرَدَهُ وَفَلَهُ
وَكُلَّ الْغُلَا عِنْدَهُ وَكُلَّ الْحَبَايِبِ

وَاللَّهُ مَهْمَا صَارَ وَاللَّهُ مَا ذَلَهُ
قَلْبَ عَشَقٍ لَهُ عَاسِفِينَ الرِّكَايِبِ

جَانِي يَبِيٍّ وَصَلِيٍّ وَكُلِّ وَقْفٍ لَهُ
قَالُوا حَبِيبُكَ يَالْغُضِي بِهِ طَلَايِبُ !

زَفُونِي لِغَيْرِهِ وَأَنَا كُنْتُ خَلَهُ
وَكُلَّ الْغُلَا عِنْدَهُ وَكُلَّ الْقَرَايِبِ

مریت داره عقب سبعة اهله
عقب الزمن ماقال يكفي مصایب
یا ناس خلی بدنیه وش حصل له
قالوا حبیبك راح بعدك هباب
قلت اسکتوا يكفي بقلبی محله
واحس بانفاسه ولو كان غایب
صدفه وانا واقف علی راس تله
ودموع عینی فوق خدی سکايب

لمحت لي قبرٍ حشى القلب تله
مكتوب اسمه في جبين النصاب

يا قلب دمع العين لو سال كله
ما يرد لك شخص خذته الهباب

عسى إلهي يحفظه تحت ظله
وتمطر على قبره مزون السحاب

راح العمر

راح العمر يا صاحبي وانت ما جيت
ولا مرّني طيفك ولو نصف ساعه

ملت بعدك يا زيش العين ملت
والقلب طفل وصايبتة المجاعه

من يوم بعته صاحبي عنه واقفيت
كنه شجاع كسروا له ذراعاه

اشوف غيري مهتني ليت يا ليت
اسمع علومك لو هي إلا اشاعه

البعد يذبح وانت بالقلب شببت
نارٍ ومالي عندكم من شفاعه
كم يوم بغيابك من الهم قاسيت
تهجر فؤادي وتحسب انها شجاعه
ولو كنت تدري بأن لك بالحشا بيت
وانه غلاكم فاق كل الجماعه
واني بدونك ضايع.. كان فزيت
ورicht قلبي من كثر هالقطاعه

بسألك انا يا صاحبي يوم صديت
واسمع رفيق ما يغير طباعه
في بعدنا يا هل ترى يوم حنيت ؟
مثلي وقلبك معلن عن ضياعه؟!

يا خوي ..

يا خوي فُكّر وانتبه وين بتروح
دربك غريب ومن يماشيك كذاب
اختك تنادي لك عسى ترجع الروح
ويا ويل منهو ضايع وماله أصحاب
قلنا بتكبر والعجب يومك تشوح
عن صوتي اللي مسكّر دونه الباب
وتشيل حمل اللي من الهم مذبوح
أبوي ذاك اللي له القلب مُحَرَّاب

وتُحجج أُمِّي قبل ما تطلع الروح
حيث إنها دايِم تقول الولد خاب
ويا خوي فكَرِّ دَام هالْبَاب مفتوح
وهذا ضياعك يا حمد ماله أسباب
درب المَراجِل يتبعه كل مُمدوح
وابْغاك دايِم للعلا دوم طَلاب
امشي بكيفك بس بترد وتنوح
وبنُشوف دمعك لو غبي بين الأهداب

يا كم نصحت وكم ثُملت لُجروح
وكم ضاعت أحلامٌ من الوقت ترتاب
رحنا وجينا وظنُنتي فيك مصلوح
وهذا الأمل ما ينقطع بين الأحباب

طال الغياب

قالوا حبيبك راجعٍ عقب يومين
هَيَّا ألبسي احلى الملابس وغني

قلت السموحه قلبنا صار قلبين
خلي تناساني وانا خاب ظني

قالوا تواضع لا تشب البراكين
خلك يغني لك على كل فني

قلت اسكتوا والله يعدل الموازين
حتى القصايد في غيابه بكني

قالوا تَكْرَمْ خله اليوم وألحين
وبارك رجوعه بالسلامه وهني

قلت الصبر مُرٍ وانا شلت عامين
جرحه بقلبي يا عرب ما جفني

قالوا يحبك قلت وين البراهين
وحُبه بقلبي لو سقى ماروني

قالوا علامك وش حصل للمحبين؟!
خلوا الليالي من هواكم تغني

قلت احكموا لو للمحبه قوانين
منه المدامع في غيابه دعني
بودعه وارحل ولا ادري على وين
عسى بعمره يهتني من طعني !

نور البرق

انا بالشعر كم حرفي تعثر بس مابه فرق

يطيح ويرجع يوقف ابد ماقد علي ابطا

لقيته والقلم بأيدي ولي قلب رهيف رق

ومن يطلبه قال ابشر خذا من فرحته واعطا

اقول الشعر من حزني ولا حد سرقني سرق

ولا قد ضاعت افكاري ولو وصلتها لطنطا

ابوي الشاعر وخالي خذاني بين غرب وشرق

ولا غيرت من طبعي ولا حد علي اخطا

يقولون البحر عيني وعيني يابشر موزرق

وبين البحر والمينا وعيني جرح ينحطا

ويقولون الشعر ومضه تشوفه مثل نور البرق

وانا اشوف الشعر طفلٍ يزيد الهم والضغطا

فكيف ابكي على صدره وهو خبلٍ حرقني حرق

وانا ما استحملة شعرٍ يشد القلب ويمطاً

وانالي من عرفت الصح ما بغرق مع من غرق

ولا ارضى الخاين يعود بلا قيد ولا شرطاً

انا شلت الصبر سيفٍ اذا ضاقت علي الطرق

ولا ظني ان خلق شخصٍ له اعيوني بتتوطا

ترى طبع الوفا فيني تشوفه مثل ذاك العرق

مثل لون البحر صافي وحزنه دايم امغطا

احيا على ذكرك

عوّد ترى شوفك يعدل مزاجي
ويفك قلبي من مواويل وهموم

يا ما حبيبي قلت لك يا سراجي
ياربعي وقومي وامسي مع اليوم

اعلنت لك شوقي وكل احتياجي
وابطيت يا خلي ولا جتني علوم

عوّد ترى وصلك شفائي وعلاجي
عوّد على خلٍ جفَى عينه النوم

يا ما رقبتك يالغضي بابتهاجي
وزفيت لك حلمي وجيتك مع القوم
محروم من بعدك وتضحك حجاجي
لو شافتك ساعه ولو كانت حلوم
احيا على ذكرك واعدّل مزاجي
وتخف في وصلك براكين وغيوم

آخر قصيده

ألا ياليل لو تسمح حبيبي وشهي أخباره

يعد أنجومك ويسهر مثل ما كنت أنا خابر ؟

وألا ياليل من بَعدي عسى ما غَيّر أفكاره

بعده اللي أنا أحبه صدوقٍ بالهوى شاعر ؟

وألا ياليل خبرني عن آخر بيت بأشعاره

قصيده منه تكفيني وتقول إني معه حاضر

أنا اللي لو عشق غيري ابد ما قل مقداره

أحبه كثر ما يقسى علي وكثر ما سافر

وَأَلَا يَالِيلُ لَوْ تَدْرِي فَبُحْرِهِ صَرَّتْ مُحَارَهُ

وَبُحْرِهِ أَهْ يَا كَبْرَهُ غَزِيرَ وَمُظْلَمَ وَقَاهِرَ

وَأَشُوفَهُ فِي قَصْرِ لَكِنْ عَجَزَتْ أَعْدِيْ أَسْوَارَهُ

فِيَا حَظَّ الَّذِي حَبَهُ وَأَسْمَهُ دَارَ عَا الْخَاطِرَ

وَأَلَا يَالِيلُ خَبَرْنِي عَسَى مَا طَفَيْتِ أَنْوَارَهُ

عَسَى قَلْبُهُ مِثْلَ قَلْبِي يَحِبُّ وَعَشَقَهُمْ طَاهِرَ

وَأَلَا يَالِيلُ عَلَّمَنِي مِنَ اللَّيْلِ بَعْدَنَا زَارَهُ

حَبِيبٍ يَعِشْقُهُ وَلَا غَرِيبٍ جَاهُ ثُمَّ غَادَرَ ؟

احترى شوفك

كان ودي بشوفك وامنعتك الظروف
وبصراحه ياغالي ما هقيتك تغيب

كم حسبنا الدقايق لبتك انتة تشوف
كم تعذب فؤادي وذا شعورٍ غريب

وتدري انه بصوتك ينتهي كل خوف
وبقصيدك يا غالي اشعر انك قريب

كنت امنّي عيوني بشوفتك والكفوف
واحترى يوم شوفك ليه ظني يخيب !

قلت اصبر عيوني واستهل الحروف
واكتب اللي احسه يوم هذا النصيب

ما بزعل عيوني من رفيقٍ عطوف
صاحبٍ من عرفته يسبقه كل طيب

ادري ابها المشاغل والزمن ما يروف
والحكم حكم ربي هو لنا من يجيب

ودام دارك بعيد وعاندتك الظروف
خل صوتك ياغالي عنّا مايغيب

غاب القمر

غاب القمر بين السحب واتبدلت الاحوال
واللي بغيته للاسف كنه ابد ما يسمع

حتى عيوني دمّعت من يوم غاب الغالي
صار الجسد مثل الفضا والصوت ليته ينفع

حتى مرايا غرفتي تبكي على موالي
وحزنٍ شموخه كالجبل ياريت لو هو يخضع

ولا قد طلبت بدنيتي شي يمر اقبالي
غير السحا مثل الزهر ريحة عبيره تطبع

أحيان أحس أن العرب تبغي تدوس أظلالني
وأحيان أقول أن العمر سيل مضي ما يرجع
وفي دنيتني شفت العنا وقلت الألم يحلالي
مثل الغريب وكلمته يرجع وعينه تدمع
ويا كم شكيت وللأسف كل علي متعالي
ويا كم خذيت من الحزن والنفس عيت تقنع
وهذا زمانني لي متى يطوي جميع آمالي
حلمي دفتنه بالثرى ولا ريت منهو يفزع

ولا عاد لي خلٍ وفي يشرب معي فنجالِي
يا كود بايدي أمسكه وابكي بصوتٍ يلسع

اذكر زمانٍ لي مضى واليوم ما يطرالي
حل الحزن فيّ وسكن نجمٌ ونوره يسطع

غاب القمر بين السحب يا حظي ويا فالي
حتى رفيقي ما سمع والظن بانه يقطع

ما عاد لي فيهم أمل دام الرجا بالوالي
بنهي قصيدي واختمه دام الحزن ماينفع

obeikandi.com

تغروده

کلِ تعلم بُس انا ملزومه
اذکر حبیبی و آتحری علومه
اهواه بس من الخطا محشومه
من قبل احبه قدُ عرفت سلومه
فی دیرتی کلِ اخذ مقسومه
و تمت عیونی من الکری مخرومه
فیها الحبایب عندنا ملمومه
یاما جلسنا بساعة معلومه

نذكر فعائل فارسي وعلومه

شهم قوي ماتكل عزومه

ادعي الهي يحفظه ويدومه

واللي في باله ياعساه يرومه

طبعك تغيّر

طبعك تُغيّر.. وانا والله ما تغيّر

باقي على العهد واترياك ياغالي

مرت عليه ظروفٍ والله تكدر

بس ان نجمك حبيبي عندنا يلالي

واشم عطرك واحسه دايم مسير

قلبي وعقلي ومن هو يرثي لحالي

اشوف قسوه وشخصٍ دوم متكبر

لكن بحلل بما يطري على بالي

حبك بقلبي مثل نهرٍ ومتحدر
ينعش عظامي من اولها الى التالي
خل الحكاوي وهمس الناس واتذكر
عمرك دقيقه وخلٍ عنك يسالي
لي قلت احبك فهذا صار وتقدر
ولا يمنع اللي انكتب عم ولا خالي
وانا اعزك واشوفك دوم متغير
ولي قلت بنسى تذكرتك بموالي

يا بو حمد

يا بو حمد بي حسرةٍ داخل الكبد
حسرة يتيماً ماخزينٍ حاله
يزهم بني عمه ولا حصل الرد
يبكي على اللي راح واللي مضى له
ليله عذاب ودمعته تجرح الخد
وان قال ظلم قالوا انت بجهاله
ولو ان قلبه يملكه كان قد شد
لي صار ربعه عايشين بضالاه !

يمشي مع الحيين ساعه ويرتد

كنه بقبر وكل هم طراله

يذكر ربوع فيهم الظهر يشتد

ربع تحبه ما هم أهل العمال

ويذكر زمان فيهم الشعر ينعد

أهل المراجل والصدق والعداله

ماهم من اللي كل يوم "لهم" وعد

أهل المصالح والكذب والنذاله

مثلي مثل منهو على الدين محتد
يرجي من الرحمن يرأف بحاله
اهله جياع وماضرى بيوم تمتد
ايداه لغير اللي عليه اتكاله
رب خلق سبع وسبع بلا عمد
رب كريم وماخسر من شكاله
يا ابو حمد بي علة داخل الكبد
وانت العزيز اللي عرف ماجراله

ما فاد فيني دختر الهند والسند
واللي لفاني واغترب عن عياله
جرحي غوير وما كشفته انا لحد
ولا ينكشف سرِّ بعيد مناله
هذا زمانٍ نشتكى فيه للعبد
ويهون من نغلي ونقطع وصاله
دنيا دنيه وكل يوم لها وعد
ومايفضح الرجال غير الجهاله !

لي قال قوله واختفى ساعة الجد
وان دوروله مالقوا الا عقاله
هذا وختم القصيده فلا بد
اقول قولتي قبل ما اقطع حباله
وش خانته سيف بلا فارس وغمد
يلعب به المجنون والا عياله !

غريق الشوق

انا ما جيت، لك لكن خذاني الشوق لك يا زين
رمانى في بحر عينك وخلاني غريق الشوق
تمنيت التقى فيكم واشوف اللي ملا هالعين
واقول اللي ملك قلبي خذاني بالهوى والذوق
انا يا صاحبي درب طويل ما مشاه اثنين
تعب منهو وقف يمي وانا ادري بالعمر مسروق
خذتني عزة الدنيا وصار الشين عندي زين
وصرت ارجي من عيونك تساعد صوتي المخنوق

تعبت اصايح بدمعي متى وقت الوصل بيحين

متى بلقى نظر عيني " لجل " يشفي الالم والعوق

انا لو ضاعت احلامي وقصري ينبنى من طين

ولو جار الزمن والا يصير الحزن لي كالطوق

ولو مات الفرع عندي وقلبي ينقسم قلبين

حشا ما انسى الذي وصله مثل دم سكن لعروق

وانا يا صاحبي جيتك معي حلو العنب والتين

معي ورد سكن بيدي وعطر للقا مسبوق

ومعي من فرحة الماضي كلام ما يبي تخمين
تشوفه واضح مثله.. مثل رعد وسبقه ابروق
انا ما جيت لك لكن فؤادي والنظر مقفين
يبون اعيش في عينك واكون بدنيتك معشوق
وهاك القلب وتأمر عليّه بالقسا واللين
اخذ روح تبي قربك واخذ مني حلا المنطوق

وينك ؟..

لك كتبت الشعر وألمح وأقول
زورنا بالعين وأنسى ما حصل
لا تقول أهلي وأنا قلت الحلول
وكل صعبٍ لازمٍ بعده سهل
وتدري إني دايماً لشوفك عجول
انتظر ما مات في قلبي الأمل
كل يوم أعذار والشرح يطول
وأخرتها تقول بثلم الشمل !

البلد نفسه وبينني ما تحول

لا هضاب ولا سهول ولا جبل

جبت لك أعذار وأولها الخمول

وان شخصك صايبه بعض الكسل!

وأخر الأعذار قلت انك خجول ؟!

«لجل» ابرر مايصير وماحصل

مقدر ظروفك وأنا ماني جهول

بس أخاف اكبر ويسكني الخجل

انت تدري دون ما «ابين» واقول
العمر ورده ويُمضي في عجل
لا تقول أهلي ودور لك حلول
ولو يطول البعد آخرته وصل

وين ما صديت..

انت ياللي الحب سوى بك سوايا
ارفق بقلبٍ لغيرك ما انكوى

مثلكم يازين انا دست الخطايا
وردةٍ والشوك حبلٍ وألتوى

جيتني دمعٍ وانا جيتك عطايا
انت ياللي القلب منك ما روى

لاتدور لي وانا بين الضحايا
طفلةٍ والعود توه ما استوى

ان لقيتك شوق يمنعي سحايا
والعواذل بالحكي كل نوى
من جحيم الصمت جيت اشكي عنايا
كن صوت الرعد في قلبي دوى
من سمع وصفك لنا ساق المطايا
والذهب والماس هن عندي سوى
لا تقول الورد ماخذ من حلايا
ولاتزيد الهرج وعلوم الهوى

جيتني بالشعر يا عذب السجايا
كن ذاك الشعر ما غيرك حوى
ويكفي ان وجهك على كل المرايا
وين ما صديت لي وجهك ضوى

لهيب الشوق

يا نور عيني لهيب الشوق عذبني
وهذا التجافي ترا كله من أسبابك
ملت بُعدك و طيفك ليت طمّني
لأنه عذابي يزيد بسبب غيابه
وما دمت تدري بشوقي كيف تظلمني؟!
الحق حقٍ وشوقي يسكن أهداك
عطني علومك و حالك عنه خبرني
يا لغالي اللي حياتي دوم تُحلبك

أخشى غيابك لانك قطعةٍ مني
ولا ارضى العواذل ابد في يوم تغتابك
بهديك قلبٍ يخاف انك تخاصمني
وبهديك عمري ما دام العمر لحسابك
أمر تدلل وقول اللي تبي لأني
أحب طبعك و أحب ألعب على أعصابك
وأحب أشوفك مريح البال متهني
مرتاح قلبك ومثلي مسكرٍ بابك !
والعذر منك ولكن بس علمني
إن طال بُعدك وش اللي يصبر أحبابك ؟!

إنت المطر

اهدي قصيدي لك عسى ما به احراج
لك يا مُعذَّب بالقصايد عيوني

يا عين حر ومسكنه فوق الأبراج
منك السموحه لو ظهر لك جنوني

ودّي أقول ان الشعر منك يُحتاج
انت المطر يا سيدي وانت كوني

كل المشاعر تنتظر يوم الإفراج
والقصد أوضح ضحكتي من شجوني

عشقي لكم يا سيدي ماله اعلاج
وعجزت أكابر لي متى يُخرجوني
هذي دموعي دائم إتسبب إزعاج
تُخرج عيوني بالبكا والظنوني
واصبر واقول إن الصبر فيه لابهاج
ولو هم تجنّوا وللمآسي نفوني
واضحك على حالي وأقول الحزن تاج
وإن القصايد همها في جفوني

يا سيدي قل لي وش الحل لو هاج
فكري تلعث من سبايب طعوني

وأشوف نفسي ضايع بين الأمواج
وأمواج بحرك ليتهم لك خذوني

في شوفتك تضحك لك احجاج وحجاج
وانا بشعرك بقهر اللي بلوني

عسى عدوك بينه وبينك اسياج
وعسى نشوفك سيدي بالعيوني

صاحبي بالقلب

يا رفيقي بطلبك واقول حاجه
والرجا تسمع كلامي وتفهمه
ضايقٍ فكري ومتعكر مزاجه
وان لفاك الضيف لازم تكرمه
وده يسولف وبك يلقي علاجه
ومن كلام الناس ليتك ترحمه
ما يبي ناسٍ تعقد له حجاجه
ولا يبي قلبٍ يروح ويصدمه

رفقة الطيب ترى كل احتياجه
وان حصل او صار شخص يفهمه
وتدري ان الفيل يرخص دون عاجه
والرفيق الزين لازم تغنمه
قبل ما اعرفك كأني في زجاجة
والكلام الصعب يبغى ترجمه
والزمان اليوم مدري كم خراجه
كم يبني مني وكم هو يلزمه

ولو يجور الوقت او زاد اعوجاجه

صاحبي بالقلب يا كيف اظلمه

باتقهوى دله واشرب هماجه

وكلما حنيت له جيت اعزمه

بعض الحكيم

إذ اربى كتب لى فى قلوب الناس بعض الحب

فذا يعنى بأن الوقت يفتح للبخت ومضه

خذانى طيفك و سافر شمال و ردنى للغرب

مثل ذاك الحمام اللى رحل ثم عود الارضه

وأنا شفتك مثل ياللى زعيمٍ قاد ذاك السرب

بطيبة قلبك وروحك بتملك من تبى بلحظه

فلا تهتم بالدنيا و سائر من طلبك القرب

رفيقك وقت ما تحزن و همك دائم يقضه

تدور ع الحزن مثلي، ومثلك كم يحب الصعب
وانا اسأل يا عسى منهو تركته ما وقف نبضه
مشيت ادروب من حزنك وغيرك ما سلك له درب
ولا فكر إذا ربعه ذهب أو بعضهم فضه
ترا بعض الحكيم يخذع يصبونه بوجهك صب
وإذا زار الدمع خدك يقولوا: ضايع حظه
معك دائم إذا بتضحك وإذا عندك كلام ولعب
وإذا شافوا الزمن ضدك تلاشوا بس في غمضه
رعى الله صاحب دائم معاك ولا يعرف الكذب
يحبك مثلما تحبه ومن حُبك نسي فرضه

دنيا..

توني دريت ان الهوى يذبح القلب
وان اصعب الفرقى فراق الحبايب

وتوني دريت ان الدمع راحة الصب
وان العشق ماجاب غير المصايب

غابوا الحبايب وانقلب مزحهم جد
واتناثرت الاحلام مثل الهبايب

اللي رحل واللي اتجه بالحزن شرق
واللي خذاه الموت غصب ونهايب

شَبَّوْا وشَابَوْا والحزن من ظمى النفس
والناس ما ترحم ولو هي طلايب

حظي وحظك مختفي يا ردى الحظ
وكلٍ جرحنا دون ذنب وسبايب

وكم واحدٍ قال الصبر يتعب القلب
وما ينفعك حتى ولو صرت شايب

اوله يذبح بالرضى وكثرة الصمت
واخره حزنٍ مسكنه بالهدايب

يا طول صبري والعمر راح مارد
حتى الفرح من دنيتي صار غايب
كل جرحني يحسب اني كما الورد
اصبر على اهلي كلهم والقرايب
ويا ليتهم حسوا بما داخل الكبد
هم وألم ودموعي اللي سكايب
طال السفر يا ليتني عفت من عف
دام اصعب الفرقى فراق الحبايب

أكبر غلط

أكبر غلط تمشي وخلق تخليه
وتجر قلبك والخساره فؤادك
خلق صبور وموقفك لو تقويه
تملك رفيقٍ ما يفيدُه عنادك
هذي حياتك والعمر في تدنيّه
وقتك يروح وكلمتك هي جوادك
أما تحن وصاحبك ما تعنيه
والأ تقول ان البعد هو مرادك

والأَّ تقول ان الغلا مَنَّه وفيه
والا عليه اليوم تعلن حدادك
حرام لدروب الهنا ما توديه
وحرام لو تقسى عليه ابَّعادك
كم هو تمنى بالليالي تغنيه
طفلٍ سلبته ضايع في سوادك
والا تحاول بالقصايد تسليه ؟!
يرضى بعذرِكَ طامع في ودادك

اتعبه وقته بس وده تهنیه
لو تصبح الجمره ويصبح رمادك
وقته معاك يطيب وانتة تحليه
واكبر دليل انه تمنى فؤادك

شب الحزن

شب الحزن بين الرموش وعانقه

حزن بقلبي والالم ما هو سوى

ما شفت غير الهم يا هي حارقه

دمعٍ مشى ع الخد لي منه روى

اشكي لوقتي والليالي سارقه

والعمر ما وقّف ولا ظني نوى

ذاك الزمان اللي مضى له عاشقه

يا ليت لو يرجع ويتركنا سوى

صمتي يعذبني وانا به غارقه
والشوق يذبح والهجر ذيب عوى
جانني يبشرني ويضحك بارقه
حزنٍ لواني من بعد ما هو التوى
ما غاب عني لا ولا قد فارقه
يسكن بقلبي والالم ما هو سوى
مدري السبب مني او اني عاقله
بين الجروح وحزني اللي ما انطوى

فرحتي

قلت له بالعين مسكنكم قال لي بالقلب سكناكم

قلت والله صدق نعشكم قال يا مرحب وحياكم

قلت له بالخير نذكركم ولا خطر في البال ننساكم

قال يعمل الروح فدوتكم في البشر ما حد شرواكم

قلت له بالحال نعلمكم لي حصل في يوم فرقاكم

قال يعمل الله يسعدكم كيف بنسى بيوم ذكراكم

قلت شوق العين يطلبكم يحترقها يوم لقياكم

ينتظر ويقول شوفتكم فرحتي هي بس روياكم

قال يعل الرب يحرسكم وين ماسرتوا ويرعاكم

وفي الختم بقول طلتكم هي شفا من صار يهواكم

كلام الناس

حبايب نفترق واحنا حبايب
وننسى الحب لو هو ما نسانا
حكمننا للاسف أهل وقرايب
كلام الناس في لحظه خذانا
توادعني وانا دمعي سكايب
على الخدين يا وقت عصانا
تروح وتبتعد والقلب ذايب
كأن الكون ما يحوي سوانا

احبك واشهد ان بين الهدايب
غلاك يجول بالخاطر معانا
ظروفك باعدتك وصرت غايب
حبيبي والزمن زوّد شقانا
تسافر دون ماتبدي السبايب
ودمع العين لك بيّن غلانا
حبايب نفترق واحنا حبايب
وتبقى بس ذكرى من هوانا
عواید ربّعنا اهل الركايب
تدوس الحب وتزود عنانا

ارسم لك الحب

حبك بقلبي لآخر يوم من عمري
واعطي الضمانه واصدقها ولك عيني

داخل فؤادي بحطك دايم بصدري
ارقد وأمن مادام ايديك بيديني

ما قد رسمت الاماني لغيرك بشعري
صحري "حياتي" وصوتك بس يحييني

شوف الليالي تأمل جوها السحري
يا ماخذ العمر كله واجمل سنيني

غلاك باقي بمجرى الدم هو يجري
ولا ضيّع الوقت حبك يا مهنيني
ارسم لك الحب .. لكن كيف لو تدري
ان اكثر الحب ظني مصدره فيني
ان كان قلبي عشقكم ما هو بأمرى
وحكم الليالي ترى ما بينك وبينى
شفت السعاده معاكم يا سبب فخري
ومادمت عندي دخيلك « لا » تخلينى
انسى القرايب ولكن دايم بفكري
صورتك يا روح روحي هي تسلينى

عشرين عام

عشرين عام وكل عامٍ وری عام
قصه حزينه خاسرٍ من كتبها
دمعٍ يعذب تالي العمر واوهام
حلمٍ بعيد ومسكنه في هديها
دنيا غريبه حكمها حكم الاعدام
ما يوم طاعت للاسف من طلبها
ولو جيتها تمشي على روس الاقدام
متخطيٍ سهل الامور وصعبها

متحملٍ ظلم الليالي والايام
متأملٍ تلقى السعد في لهبها

ترسم جنونك والمشاعر والاحلام
تعجبك لي صاحت وزادت صخبها

همك وهمك بس تمشي لقدام
وهي همها يا صاحبي من خطبها

تعطيك ما تطلب على حضنها ونام
واحلم بقصر بس حاذر غضبها

والعمر لو طول فلا يوم قد دام
يمضي وتمضي وخاسر من رقبها
ولو غرتك في حسنها كل الاسقام
وكل الهموم اللي تجي من سببها
شف كم عزيز ذلته وعاش وانظام
وشوف الديار ووين راحو عربها
غابوا الحبايب وش بقى غير الاعظام
ولا باقي الا ذكرهم يا عجبها

طيفه يصالحني

البارحه قلبي من الجرح ينزف
ودموع عيني مثل وبلٍ يهلاّ

البارحه نامت عيونه وانا ارقص
رقص الجريح اللي به الضيم حلاّ

من سبته راحت حياتي وانا ارقب
لا هو بواصلني ولا هو تخلّا

منه اشتكي علّه على القلب يرفق
ويحس باللي فالضمير ايتعلا

سكن تمكن من فؤادي وانا احسب
دمع ذرفته كل ماليل ولا^و
ولاجيت ابنسى ما حصل يوم وارقد
لقيت له في وسط قلبي محلا^و
سكن تعلقا في ضميري وانا احرق
حبٍ إلا شلته بكى ثم تبلا^و
والمشكله بأنه مع البعد يقرب
طيفه يصلحني وانا اقول كلا^و

حبٍ طرحته ثم جمعته وانا ارقب
من بيني وبينه سيوفٍ تسلّ
والله لو يبعد ويبعد ويبعد
ما انسى حبيبٍ كل ماجيت هلا

صدق المشاعر

فرشت لك قلبي بصدق المشاعر
واهديتك اللي باقي من سيني
يا للأسف يا خل ما انتة بشاعر
صدقك خداع وزينكم صار شيني
مستحمله هجرك وانا اقول باكر
ترجع حبيبي وكل شي يزيني
واللي حصل بنساه لو كنت ذاكر
بعض الليالي عسرهما ما يليني

بين الهموم وبين وارد وصادر
وبين الغلا والرخص شي ثميني
ما ابغى لكم قلبٍ على البعد قادر
يطري الوداع بكل وقتٍ وحيني

دنيا الخضوع

وش بقى لو كثر عيني الدموع
وانتحر في داخلي معنى الحنان
وش بقى لو تنظفي كل الشموع
واختفى من دنيتي معنى الامان !
صاحبي هالناس في هم الطلوع
كيف توصل للسما واعلى مكان
صاحبي ماهمها معنى الخضوع
تدفع الغالي و تاليها الهوان

ترخص اللي ما رخص بين الضلوع
صدق ضاع الحب في هذا الزمان
ظنتي هالناس ما فيهم قنوع
لو بتعطيهن نصخ صدرك ضمان
صاحبي هالوقت كل به يجوع
وعند باب الخوف حطورك بيان
هالزمن يا صاحبي قال الرجوع
اطلبه حَقِّك وكلِّ له لسان

للاسف

كنت اظن اني مهمه وللاسف
ما دريت اني اسبب لك ملل
يوم ما رديت به شي مختلف
كني الضايع وصايبه الشلل
الحكي ما بل من ريقه نشف
ولا يبل الشوق من صابه خلل
كان به غيري دخيلك تعترف
لاتعيش بصمت وتزيد العلل

قول احبك لي وقلعة من عرف
مايموت الورد لي صابه بلل
يا رفيع الشان كم قلبي حلف
وكم بنى لك دار وقصور وفلل
للاسف غدار والمخفي انكشف
تتبع الكذاب لدروب الزلل

بعض الغلا

بعض الغلا يا صاحبي يتعب القلب
وبعض الغلا لو يذبح القلب ما تاب
وانا وغلاي وشوقنا نطلب القرب
من قلبك اللي جيته اليوم طلاب
انا طلبتك دربك يصير لي درب
يا اغلى عزيز مسكنه بين الاهداب
اسمع بصوتي رجفة ما لها ذنب
واقرا بشعري لو انا كنت كذاب

انت الامير وقلبنا صار لك شعب
وانت الحكيم اللي له العين محراب
وانت الذي في دربنا ساقك الرب
وازهر بقربك وردي اللي بكم ذاب
ويشهد علينا قلبي اللي بكم حب
صوتك وقلبك والوله ماله اسباب
وظني اذا غبتوا انا بعلن الحرب
واحشد جيوشٍ تجعل القلب يرتاب
يا صاحبي قلبي ترى يعشق الصعب
وانت الذي يامنوتي منه منصاب

جذاب

ابو عيونٍ سود كالليل مثله انا ماشفت والله

له صف رمش يابت الويل وخشم كما سيف يسله

عليه نخشى من هل العين مصيون ما حد قد وصله

بقري انا الكرسي وياسين حتى عذوله ما يدله

طيبه ترى بالصدق مرفوق ماقد تنازل عن محله

بالكون لا ماشفت مخلوق جذاب يسبي من نظر له

بالطَّبِّ هو قد صار موصوف يشفيك من جرحٍ وعله

صوته ترى يغني عن الشوف يحميه ربي تحت ظله

نورٍ تعلا في السما يلوح مثله حشى ما خلق واللّه

طيبه علينا مسك ويفوح زينٍ وكل به تولّه

مملكتي

لي رفيقٍ ضحكته مملكتي
وان بغيت اقول يمنعي حيائي
كم بكيت وكم سألت اسألتي
وما يفيد الصبر والسَّبه بكائي
وكنت ادور بس انا لمصلحتي
ولا اطيعه فيلسوف ولا روائي
لين صار النور لي ومدرستي
وصرت اكرم له من الحجاج والطائي

طيب بطبعه حسب معرفتي
كنه البلسم واصبح لي دوائي
ما ابيه يقول لي ملهمتي
ولا ابيه يغيب دام انه ضيائي
ولا ابيه يكون لي محكمتي
ولا يصير بطبعه انسانٍ عدائي
هو رفيق الدرب لي وراحلتي
ما تسير إلا قبل ما اعلن ولائي
دوك قلبي وعيني ومحفظتي
صورتك فيها وهذا هو عزائي

شاعر اخرطي !..

حد منهم « شاعر المرأه » وحد سمى نفسه الشاعر

وحد منهم يدّعي الجراءه كاذب وشلون يتشاعر

عمّه اللي يحرّر الصفحه والاّ هو من ناس آكابر

لو بغى في غمضه ولمحه يصبح اسمه « ع » الشعر داير

ما يهم ان كان به كسره ولا يهم ان كان متطاير

همّه انه ينعرف شعره حتى لو هو كان متناثر

به غرور.. تسبقه رزه ما يطيع ولا هو يُشاور

كان وده لو حصل هّزه تاخذ الشّعار وتغادر

شاعر ما ينعرف دربه كل شعره كذب ومهاتر

حالف ان الشعر في قلبه وانه اللي بس به شاعر

ليه الغياب

يا نور عيني يا بعد كل هالناس
يا فرحة الدنيا ومعنى وجودي

تشتاق لك عيني وروحي والانفاس
ويشتاق لك سمعي ونفحات عودي

جاني من غيابك من الهم وسواس
وامسيت انادي والخلايق رقودي

والبعد يا عمري ترى كله اتعاس
للي يعزك والصبر له حدودي

دمت الحياه وجنتي ودام هالراس
حي فانا بعطيك مني العهدي
أحفظ ودادك واجعل القلب مجلاس
وازرع بدربك من غلاك الورودي
واجمع لك اشواق من الصعب تنقاس
وادعي عسى الفرحه عليكم تعودي
اعشق كلامك لي تكلمت بأحاساس
واطرب لصوتك يا هنائي وسعودي

واشكر زمانٍ بك جمعني من الناس
وقت خذاني بين برق ورعودي
انت الغلا كله وروحي والانفاس
عمري بدونك حط بين اللحودي
والشمس لو تشرق ف.. صوتك ولا باس
يكفي تكلمني وتسمع ردودي
ويكفي اشوفك في دجى الليل نبراس
يا حلمي الاول واخر حدودي

خير يا قلبي ؟!

خير يا قلبي عسى ما به خلاف

وش بلاك اليوم وش غير هواك ؟!

كنت اظنك لي طروا العشق بتخاف

ترتجف ويزيد عندك الارتباك !

ما هقيت يكون عندك الاحتراف

في فنون العشق يا مكبر خطاك !

تدري أن الحب آخره انكساف

وتدري انه صعب ما يمشي معاك

الهوى يا قلب كل أرضه جفاف
وأنت تدري وكل أمره ما خفاك

لعبو دارك.. تشوف ولا تخاف !
ما أنت قلبي ذاك..! قلبي وش بلاك ؟

صرت تسهر صار طبعك باختلاف
وأنت كنت السنع قلبي من خذاك ؟

دنيتك يا قلب.. ما فيها إئتلاف
ليه تعشق.. ليه وتزوّد عناك ؟!

لو تبي تكذب خذينا الاعتراف
من كلامك والنظر أو من سواك
والعشق والله ما يبغى اكتشاف
يفضحك يا قلب.. ويبين عناك
لوسمحت أرأف بناسٍ لك ضعاف
ما تبي تقسى وتتجاهل غلاك
والرجا يا قلب شوقك لا يشاف
خلك تعاني.. وهذا هو جزاك!

ما لك عذر..

وقتٍ مضى جرحٍ برى ما نامت أعياني
عذري معك يكفي أسف يا ليت لو ترحل !

بأقي شهر ساعة عمر .. وهدى لك احزاني
بين السهر دمع نزل وارجوك لا تزعل

جاء العطا جرحٍ سطا يا كثر ما اضراني
إنت السبب روح انتحب عني ولا تسأل

قلي: متى.. فصل الشتاء ما داعب أغصاني
حتى الزهر صمته ألم ظنيته يذبل

بين الجفن برده سكن واستوطن أجفاني
ضاع الأمل وهذا الفرح ما ظنتي يكمل
قلت ابتعد رح للأبد وأرجوك تنساني
يالأسف مالك عذر وفي القرب لا تأمل
كنت انتظر وانت النظر كم طالت أزماني
عشت بألم وأنا ارتجى وبُحالي تجهل
كان الغلط فيك ارتبط وأشوفك أوطاني
خنت الوعد مدري متى وظنيتك بتخجل
وقتٍ مضى فيه الأسى كم عانق أعياني
وبين السهر والآنجمر فرحي متى يُحصل؟!

المشكلة

المشكلة ما هو سؤال العرب عنك
المشكلة هذا الوله وش علاجه ؟

اخلف برربي ناظري صار مسكنك
والقلب لي شافك يزيد ابتهاجه

ودّي بقلبي يالغلا يكون مؤطنك
لانك تسبب فرحته وانفراجة

ولأنه قلبي بفتحه لك كما البنك
حاسب عليّه لا يزيد ارتجاجة

وهذا الغياب وخاطري صاير منك
متخوِّفٍ والقلب يطلبك حاجه
إنك تشوف الجرح وآثار مطّعنك
لأنك كسرتَه مثل كسر الزجاجه
أو تصبح بقلبي على طول وأسجنك
وأحفظك من غدر الزمان وعجاجه

الوعد باكر..

سلامي للخيوي اللي كلامه كالذهب خالص

سلام يوصله مني وأنا بالشعر باخسه

رفيقي مانبي غيره وأنا من هالأمر خالص

فهيم وعارف الدنيا مجربها وله قصه

فكم لاقيت لي ربع اعزاز وحبهم راخص

ومنهم للأسف ناس على الأفراق مختصه

يقولوا ما يقولوا لك ولكن الفعل ناقص

عقول فاضيه تجمع سموم القيص وثرصه !

يقولون الوعد باكر كلامٍ للأسف راقص
كذبهم بين وظاهر ولكن نغطي الفرصه

عنيتك يا زمن واذري بخيل وللفرح قانص
تقول أمسكه ذا حبلي ولكن فيني إتقصه !

اطيعك وانت تعصاني كأنك للعمر « قالص »
« تشيل » وتاخذ وتسرق وبالاخر انا اللصه !

ولكن وين تلقى لك عزيز وبالنظر شاخص
كريم النفس ما يرضى قليله لو بقى نصّه

خبير فاهم الدنيا بطبع الناس هو باخص
يجيك بقلبه الوافي وشرك منك يمتصه
عجب حال البشر تشكي من الحمى أو الماغص
وعلى ما قيل بالدنيا يموت الجاهل بغصه

obeikandi.com

الفهرس

6	تصريح
8	شاعري المجهول
10	الليالي
13	دنيا المصالح
16	ازعل على كيفك !
18	مسموح
20	تعب
23	فلسفه
26	غصون المواجه
28	نور الدّار
31	واحشني
34	نفترق احسن !
36	علم الغيب
38	مطلقه
40	دخيلك
42	جيت من طيبي
45	البحر مثلي
48	زمان التجني
50	متى الليل يلفي ؟
53	غدر الحريم
56	صاحبني
58	ما هو غلط

60	ابعد من الارض !
63	افا والله
66	تشيل الورد
68	لك وحشه
71	حاول تفكر ؟!
74	وجودك والعدم !
76	انتهيت !
78	على الذكرى
80	غيبتك عني
82	عزيزة نفس
86	أهل الحضاره !
90	وقف دخيلك ..
92	ظل وظلاي
94	ما عدت احبه ..
96	كل الغلا
100	راح العمر
103	يا خوي ..
106	طال الغياب
109	نور البرق
112	احيا على ذكرك
114	اخر قصيده

116.....	احترى شوفك
118.....	غاب القمر
122.....	تغروده
124.....	طبعك تغير
126.....	يا بوحمد
131.....	غريق الشوق
134.....	وينك؟
137.....	وين ما صديت
140.....	لهيب الشوق
142.....	إنت المطر
145.....	صاحبى بالقلب
148.....	بعض الحكي
150.....	دنيا
153.....	أكبر غلط
156.....	شب الحزن
158.....	فرحتي
160.....	كلام الناس
162.....	ارسم لك الحب
164.....	عشرين عام
167.....	طيفه يصالحنى
170.....	صدق المشاعر
172.....	دنيا الخضوع

174.....	للاسف
176.....	بعض الغلا
178.....	جذاب
180.....	مملكتي
182.....	شاعر اخرطي ..!..
184.....	ليه الغياب
187.....	خير يا قلبي ؟!
190.....	ما لك عذر..
192.....	المشكلة
194.....	الوعد باكر..

obeikandi.com

من إصداراتنا..



هماليل..
مؤسسة اعلامية تُعنى بالأدب والفكر والثقافة
والموروث الشعبي

تلفون: 00971-2-4460777

فاكس: 00971-2-4469911

صندوق البريد: 130777

البريد الالكتروني: hamaleel@hamaleel.ae

الموقع الالكتروني: www.hamaleel.ae